

四庫全書

經部

欽定四庫全書

經部

詩總聞卷二十九

詳校官監察御史臣邱文愷

通政使司副使臣莫瞻菴覆勘

總校官原任中允臣王燕緒

校對官助教臣汪錫魁

謄錄監生臣王英紱

欽定四庫全書

詩總聞卷十九

宋王質撰

頌

聞頌一

南風雅皆周獨頌有周有魯有商魯則本國商則異代  
季子所觀其辭極天下之美恐魯僖公未足以當之史  
克亦未足以當之也杜氏以為盛德之所同也為有商

魯故同為盛德魯僖未為盛德與成湯不惟位分不倫而人品亦異季子所言容或有溢美猶之可也孔子所存當纖毫勺撮無差不應孔子魯人私于鄉里情義如此細推恐風亦有魯此當與東山等詩同次而商頌之外亦容有虞夏虞書明良之歌所謂直而不倨者也夏書五子之歌所謂哀而不怨者也不應孔子商後私于祖先系肖如此故此自孔子之後更世綿遠歷亂繁夥不惟有所遺軼而更張移易不可復考又拘于庸儒狹

士而不敢自立所見制于凶朋悍類而不敢有異其言  
姑存以待識者孔子所稱三百今三百五篇或曰舉成  
數也若後遷就以附會成數或四五六百或七八九百  
又烏可知此亦未聞子夏所問巧笑倩兮美目盼兮素  
以為絢兮今無素以為絢兮五字其語意又不相符此  
恐別有一篇非碩人也而今無見孔子所誦唐棣之華  
偏其反而豈不爾思室是遠而曰未之思也夫何遠之  
有正是兄弟隔離之意此恐常棣有首此一章而今不

存則吾自衛反魯然後樂正雅頌各得其所過此以往其不得其所者又不勝計也

聞頌二

武在頌止有一詩禮武樂最詳周家造基作樂之本其詩乃簡略如此一奏一終為一成始而北出謂攘獫狁之時也當有詩再成而滅商謂陳牧野之時也亦當有詩三成而南謂定荆蠻之時也亦當有詩四成而南國是疆謂服江漢之時也亦當有詩五成而分周公左召

公右謂分陝郊之時也亦當有詩六成而復綴以崇謂  
伐崇墉之時也亦當有詩六奏而武樂成今存武詩當  
闕他詩也如時邁如執競如酌如桓如賚如般皆當分  
配武樂但年紀久遠古法不傳學者所見不卓守株按  
圖將何時而已今以禮推之略見總干而山立武王之  
事也與執競詩相應發揚蹈厲太公之志也與酌詩相  
應武亂皆坐周公之治也樂歌至亂辭則終所以皆坐  
而享成與桓賚般等詩相應此五成以前也六成而復

綴以崇餘樂餘聲也與時邁等詩相應此五成以後也所謂遲而又久度獨比諸樂為延衰也今序者以賚為大封不見大封以桓為類禡不見類禡類禡出師之祭今詩皆保定之意以是知皆武樂所用也

聞頌三

頌諸篇多四字一句其間有一字二字三字至五字者舊說以為取數五行宋孝武使謝莊造郊祀明堂歌辭依五行數木數用三火數用七土數用五金數用九水



數用六此用月令之數也水一火二木三金四土五則  
洪範之數也蔡邕云東方有木三土五故八南方有火  
二土五故七西方有金四土五故九北方有水一土五  
故六若如謝莊之制則八言九言太長今以洪範為定  
如清廟無射于人叶對越在天則斯一字為句終章曰  
斯此餘聲也一字者也維清緝熙肇禋皆兩字為句二  
字者也天作彼作矣彼岵矣三字者也其他四字五字  
甚多俗以緝熙文王之典六字除之字則五字也無封

靡于爾邦六字除于字則五字也大率凡六字一句皆  
有助辭無助辭者則有斷句也夙夜基命宥密六字  
每三字一句基叶熙則非六字也儀式刑文王之典七  
字刑字斷刑叶方則非七字也九疇初五行萬事無不  
由之而出謝莊亦有所自來也

周頌

清廟

一章

於穆清廟肅雝顯相濟濟多士秉文之德對越在天駿  
奔走在廟不顯不承無射于人斯

維天之命

一章

維天之命於穆不已於乎不顯文王之德之純假以溢  
我我其收之駿惠我文王曾孫篤之

聞音曰命眉巾切叶純下皆以之相叶

聞句曰一句單入

總聞曰詩稱文王多以於為辭於歎聲也亦見一倡三歎遺音之意大率文王之樂自清廟之外皆有清廟之音也

維清

一章

維清止緝熙止文王之典止肇禋止迄用有成維周之禎

合兩詩一純一清即見文王氣象清廟亦一清氣象

尤著大率文王如空虛澄霽武王加之雲雨變化故不可同語也

總聞曰肇禋即肇祀謂后稷也至文王乃始有成書我  
文考克成厥勳誕膺天命以撫方夏惟九年大統未集  
勳已成而統未集故其後所言恭天成命而已所謂戎  
衣天下大定垂拱而天下治于其既成而加之孔子武  
成者文王受命有此武功成于克商此成非為此也蓋  
謂武樂一終為一成此既作武樂以象其功又作武成

以述其迹也併載於此

烈文

一章

烈文辟公錫茲祉福止惠我無疆子孫保之

此君譽臣之辭也

無封靡于爾邦維王其崇之

無封無專封也所謂無有封而不告也靡于爾邦勿私己國也所謂無曲防無遏糴也無靡皆禁止之辭

也

念茲戎功繼序其皇之止無競維人四方其訓之不顯  
維德百辟其刑之於乎前王止不忘

此君戒臣之辭也前王尚且不忘辟公其可忘也

聞音曰首尾皆以之相叶疆旁紐躋保旁紐博相

叶邦卜工切上叶封下叶崇皇胡公切叶功訓

旁紐薰叶人刑旁紐檄叶德

總聞曰大率序拘于頌以成功告神明之意故皆以神

明祭祀為言雖無見者且強而歸之此以為即政助祭  
臣工以為助祭遣廟二者以序恭詩言之皆助祭受遣  
之詩也何前不言遣於廟後乃言遣於廟慮重出也無  
由助祭之時相禮之際發語皆曰其其者期之之意也  
若使誠如序者之言亦必與臣工皆在載見有客之後  
惜乎遼邈不可復更正也

天作

一章



天作高山止大王荒之彼作矣止文王康之彼岨矣止  
岐有夷之行子孫保之

聞音曰上句叶荒康行是也行戶郎切下句叶矣  
之是也矣魚其切細推皆叶韓氏岐山操岐有  
岨我往獨處正用此詩以徂為岨當有所自來  
旁紐亦近胥祖兩韻仍通用作為做保為補皆  
叶今西北人猶有此音

聞句曰一句單入

總聞曰高山岐山也周家之興自岐繇詩可見

昊天有成命

一章

昊天有成命二后受之止成王不敢康止夙夜基止命  
宥密止於緝熙止單厥心肆其靖之

成王真成王也

聞音曰首尾以之相叶中基熙相叶靖旁紐于盈

切叶心

聞句曰兩句雙入

總聞曰並受此丕丕基見書立政初兼稱文王武王繼  
三稱文王一稱武王又稱以並受此丕丕基故此稱天  
命亦並言受至言文武之際又自微意也

我將

一章

我將我享維羊維牛維天其右之止儀式刑止文王之  
典日靖四方止伊嘏文王既右饗之止我其夙夜畏天

之威于時保之

聞音曰牛魚其切與之叶末威與之叶相似不爾  
用右旁紐夷周切叶牛方披耕切叶刑饗旁紐  
虛良切叶王吳氏三之為韻亦可

總聞曰詩多言文王之典今周禮蓋文王之時所著所  
謂惟王建國辨方正位體國經野設官分職以為民極  
皆造始之意自太王已有司空

時邁

一章

時邁其邦昊天其子之實右序有周薄言震之莫不震  
疊懷柔百神及河喬嶽允王維后明昭有周式序在位  
載戢干戈載櫜弓矢我求懿德肆于時夏允王保之

執競

一章

執競武王無競維烈不顯成康上帝是皇自彼成康奄  
有四方斤斤其明鐘鼓喤喤磬筦將降福穰穰降福

簡簡威儀反反既醉既飽福祿來反

思文

一章

思文后稷克配彼天立我烝民莫匪爾極貽我來牟帝命率育無此疆爾界陳常于時夏

聞音曰牟讀作謨育旁紐讀作余相叶夏讀作懈

叶界今謨西人猶作此音懈南人猶作此音

聞事曰毛氏來牟麥也說文來麩麥也亦可通用

總聞曰生民言誕降嘉種至此又言貽我來牟恐止是  
舜降此種故曰汝后稷播時百穀鄭氏赤烏將年麥俱  
來雖可附會要未必實然大率亦履神迹吞鳥卵之比  
毛氏則不如此也

臣工

一章

嗟嗟臣工敬爾在公王釐爾成來咨來茹止嗟嗟保介  
維莫之春亦又何求如何新畬止於皇來牟將受厥明

明昭上帝

此於皇來牟即思文貽我來牟也上帝即思文帝命也  
大率周家凡舉農事必舉后稷

迄用康年命我衆人序乃錢鎛奄觀銍艾

此恐是藉田之禮禮天子乃以元日祈穀于上帝乃  
擇元辰天子親載耒耜措之于參保介之御間三公  
九卿諸侯大夫天子躬耕帝藉天子三推三公五推  
卿諸侯九推此臣工公卿侯大夫也保介參保介也



元日正月一日也元辰三月一日也故謂莫春

聞音曰茹人余切叶畬艾魚刈切叶帝集韻茹如  
艾又皆通年禰因切叶人如克配彼天叶立我  
烝民皆不為韻然則古詩縱橫委曲多叶余但  
得叶韻已足安能盡如古風也

聞訓曰奄忽也方新畬忽刈穫當與新畬連玩即  
覺銍艾有力

聞用曰銍護禾短鎌非穫從金可見

總聞曰嗟嗟之意可以動人亦又如何皆于人有感人相與皆真情故發語吐懷有餘味也

噫嘻

一章

噫嘻成王既昭假爾率時農夫播厥百穀止駿發爾私終三十里亦服爾耕十千維耦

成王真成王也與昊天有成命成王同鄭氏昊天有成命成王成此王功也毛氏此成王成是王事也鄭

氏成此王功也何用費力也

聞音曰穀古候切叶耦集韻穀一木也一善也皆  
居候切上句爾叶里一章兩上叶兩下叶

總聞曰噫嘻亦嗟嗟但嗟嗟君接臣噫嘻下接上皆有  
情也

振鷺

一章

振鷺于飛于彼西雝我客戾止亦有斯容止在彼無惡

在此無數庶幾夙夜以永終譽

聞音曰數都故切

聞跡曰西雖但離非辟也公緘鼎王在下保雖薛氏深悉古文疑下保雖者宮名如西雖之類又尹卣正飲西宮燾燾亦雖也疑即西雖然則雖既有上下亦當有東西偶集于西爾

總聞曰不必以客遂衍意為二王之後賓亦客也何不以鹿鳴彤弓比此詩恐止是羣臣也

豐年

一章

豐年止多黍止多稌止亦有高廩止萬億及秭為酒為醴烝畀祖妣以洽百禮降福孔皆

齊侯鐘用享于其皇祖皇妣皇母皇考則祖與妣配母與考配又齊侯鐘亦然伯碩父鼎追孝于朕皇考釐仲王母乳母古者不尚言祖母考妣又碩父鼎亦然不見此則祖妣似可疑也禮以享先妣鄭氏姜嫄

也以享先祖鄭氏先王先公也易過其祖遇其妣古配耦之語多然而後世惟執父母為考妣雖書則然相傳無定稱也

聞音曰年禰因切廩旁紐作臨上下相叶中黍徐相叶皆舉里切與上四韻皆叶

聞用曰禮厚薄之齊酒厚者也醴薄者也所謂醴酒至漢猶有此名見楚元王傳

總聞曰所食之餘藏之于廩以待他年故曰亦有毛氏

亦大也集韻奕大也亦又也語勢作又為當

有瞽

一章

有瞽有瞽在周之庭止設業設虞崇牙樹羽應田縣鼓  
鞀磬祝圉既備乃奏蕭管備舉止嗶嗶厥聲肅雝和鳴  
先祖是聽我客戾止永觀厥成

聞音曰聽他經切

聞句曰首兩句總起下六句叶瞽又下五句叶庭

分叶首兩句此詩人別一規制

聞字曰說文引詩鐘鼓鏗鏘或從音執競作鏗此亦當作鏗以隍為小兒聲引詩其泣隍隍此與鐘鼓之聲不類然亦通用

總聞曰此詩雖簡合樂略備毛氏業大板也所以飾柶為縣也植為虞衡為柶蓋鐘磬之縣也毛氏崇牙上飾卷然後可以縣孔氏虞之上齒以其形卷得掛繩于上而為縣也樹羽置羽也置於柶虞之上角亦以為飾也



小師下管擊應鼓鄭氏鞞屬也大師下管播樂器令奏  
鼓陳鄭氏田當作棘棘小鼓也小胥正樂縣之位鄭氏  
樂縣鐘磬也鐘師凡樂事以鐘鼓奏九夏夏大也此則  
大鼓也應田皆小鼓也眡瞭播鼗擊頌磬笙磬小師鼓  
鼗祝敔鄭氏鼗如鼓而小亦小鼓也祝如漆甯中有椎  
敔木虎也小師鼓鼗祝敔壘簫管絃歌毛氏簫編小竹  
管如篴併而吹之此皆在庭之樂也自今推古略見先  
設鐘磬之縣于庭然後小鼓與大鼓間作小鼓與磬亦

間作小鼓多種大鼓單種小鼓節雜大鼓節全樂磬與小鼓相參為節以均和諸樂大鼓統而鎮之鼓磬既備則簫管次用蓋歷神坐舉獻爵大樂器則一定而不動凡以手擊者大也小樂器則隨步而屢移凡以口吹者小也嗶嗶大樂器之聲也肅雝和鳴小樂器之聲也至永而後成成猶終也此當是武樂禮武之備戒之已久何也曰病不得其眾也咏嘆之淫液之何也曰恐不及事也遲之遲之又久何也曰武始而北出再成而減商

三成而南四成而南國是疆五成而分周公左召公右  
六成而復綴一崇則武之遲久不亦宜乎此所謂水觀  
厥成也

潛

一章

猗與漆沮潛有多魚有鱸有鮪有鱮有鯉以享以祀以  
介景福

聞音曰祀逸職切福筆力切

總聞曰舊說漆沮水緩合為渭水則急不必如此但可  
潛則多魚春滲于於草冬匿身於穴非有可潛之所則  
魚不能蕃毛氏潛摻也孔氏積柴養魚曰摻四月匪鱸  
匪鮪潛逃于淵鶴鳴魚在于渚或潛在淵何必他求或  
謂周家起自漆沮故取此地之魚以祀先祖若爾他物  
皆取初興之地則可似未甚通也

雖

一章

有來雖雖至止肅肅相維辟公天子穆穆於薦廣牡相  
予肆祀假哉皇考綏予孝子宣哲維人文武維后燕及  
皇天克昌厥後

宣哲文武皆稱辟公之能也嘉皇考而安孝子舉其  
在列言之此宣哲者也此文武者也所以上安及乎  
天而下昌及乎後也

綏我眉壽介以繁祉既右烈考亦右文母

烈考武王文母武王之配也成王母也猶頌父鼎所

謂皇考王母大率古以考配母也或謂皇考繼言不顯皇祖其作福元孫又言汝考壽萬年俾百斯男則是祖考併言也

聞音曰后後皆狠口切又皆下五切莊子石戶之農亦作石后之農詩間以上聲取叶如桑柔祖與後叶時邁后與保叶保讀作補母滿罪切叶社

總聞曰皇考即烈考皆謂武王也孝子成王也毛氏皇

考文王也祖無稱考之理孫無稱子之法烈考武王也  
文母太姒也母子無並右之儀鄭氏光明之考文德之  
母以為見右助而歸美一是一非是者其稱考母均也  
非者右烈考蓋文王在右右文母蓋太姒在右左右配陰  
陽左陽而右陰是豈可易而或以古者以右為尊非尊  
也蓋先也左靜右動動者于用為先故漢右丞相先丞  
相次然非古義也

載見

一章

載見辟王曰求厥章龍旂陽陽和鈴央央雉革有鷩休  
有烈光率見昭考以孝以享止以介眉壽永言保之思  
皇多祜烈文辟公綏以多福俾緝熙于純嘏

聞音曰享虛良切嘏後五切嘏從古亦可以古取

聲韓氏飲沃羶鄉產祥降嘏鳳凰應奏舒翼自  
舞舞嘏相叶此當以嘏叶祜

總聞曰諸侯來朝成王又從成王而享武王也皇考昭



考烈考凡稱考皆武王薛氏言考不特其父謂其大父  
曰皇考謂其曾祖曰皇考謂其高祖曰顯考高克尊用  
作昭穆考後仲並謂祖也乃不知何祖禮王父曰皇祖  
考王母曰皇祖妣父曰皇考母曰皇妣漢儒所記已於  
周器有違而薛氏又益舛也漢距周經秦古書已殘古  
器又未出反不若後人有所考訂薛氏所見雖博不免  
有近世儒者之弊其他昭考烈考又將何以處之

有客

一章

有客有客亦白其馬有萋有且敦琢其旅有客宿宿有  
客信信言授之繫以繫其馬止薄言追之左右綏之既  
有淫威降福孔夷

聞音曰馬滿補切前後馬皆叶旅

聞字曰宿宿信信行辭疊字常事不必宿宿兩宿

信信四宿

總聞曰以白馬而行為商又行為微子似不必爾大害

義者孔氏微子來見祖廟之樂歌也京師既有商廟已  
非又自有樂歌亦非審爾何不入商頌而廁周頌孔子  
必不混轂君臣錯雜今昔如此當是佐武王克商之功  
臣叔振鐸奉陳常車周公旦把大鉞畢公把小鉞太顛  
闕天執劍毛叔鄭奉明水衛康叔封布茲召公奭贊采  
師尚父牽牲尹侯策祝既助成淫威自當受夷福也

武

一章

於皇武王無競維烈允文文王克開厥後止嗣武受之  
勝殷遏劉耆定爾功

聞音曰王相叶受旁紐叔劉旁紐陸功旁紐谷皆相叶

總聞曰鄭氏嗣武嗣子武王也甚善文王開之武王受之文  
王世子武王九十三而終則是武王癸丑生乙酉崩方其觀  
兵孟津已八十五及其克商已八十七所謂耆定爾功既老  
而始定功也禮咏嘆之淫液之鄭氏歌遲之也不知句凡七  
字凡二十八而遲遲久立于綴鄭氏奏武曲一終為一成凡

六成而復綴反位止也其節奏既如此之多其畧刻亦必所  
歷之久又當是非獨此一詩亦有他詩而後世不可復知也

閔予小子

一章

閔予小子遭家不造止嬛嬛在疚於乎皇孝永世克孝  
止念茲皇祖陟降庭止維予小子夙夜敬止止於乎皇  
王繼序思不忘

皇考武王也皇祖文王也思武王而又念文王也皇

王總言之也

聞音曰中以止相叶或用止上一字叶庭他定切

旁紐叶敬

總聞曰與烈文末辭皆同烈文君戒臣此君自謂也

訪落

一章

訪予落止率時昭考於乎悠哉朕未有艾止將予就之  
繼猶判渙維予小子未堪家多難止紹庭上下陟降厥

家休矣皇考以保明其身

紹皇考之直而陟降於家承皇考之休而保明於身  
未及于天下也則以小子之故此成王謙辭也

聞音曰艾魚刈切叶止家古胡切說文身躬也躬  
身也從呂旁紐廬可以廬取聲說文軀體也廣  
韻體身也從區亦可以區取聲叶家家讀作孤

總聞曰訪落小毖皆言未堪家多難管蔡之變武庚之  
變淮夷徐奄之變所謂多難也尋詩當是成王已悟則

既踐阼數年以後非訪落之時也經世乙酉成王踐位  
丙戌三監及淮夷叛周公東征則是踐阼之初此疑即  
在戊子三監平始黜商命魯侯伯禽誓師于費淮夷亦  
平此成王悔往更前之時也烏得謂之訪落集韻一曰  
落居也一曰宮室始成祭之為落也經世庚寅周公往  
營成周去東征西還二年得非所謂者此洛也洛或誤  
轉為落古字亦通用然落亦宅意與宅洛相通識者更

詳



敬之

一章

敬之敬之天維顯思命不易哉止無曰高高在上陟降  
厥士日監在茲止維予小子不聰敬止止日就月將學  
有緝熙于光明佛時仔肩示我顯德行

毛氏鄭氏以君臣為酬酢今觀哉茲無曰皆臣辭小  
子予我皆君辭如江漢亦合君臣為辭也

聞音曰哉將黎切明謨郎切行戶郎切

聞訓曰仔肩毛氏克也鄭氏任也以兩字為一訓  
未見

總聞曰閔予小子訪落敬之末章皆稱維予小子或謂  
前二詩禱祖考之詩故閔予小子稱皇祖者一皇考者  
一訪落稱昭考皇考者再此詩禱天之詩故稱天者一  
以為成王自發辭與前二詩均也似亦有理但語勢未  
然

小誌

一章

予其止懲而止  
恣後患莫予  
莽蜂

有小恣當有大恣此例頗多言小必有大言大必有小以別之也

自求辛螫肇允彼桃蟲

勿近莽蜂近之是自求其辛螫也其初信為桃蟲之無傷而不知其有毒也莽蜂草蜂也桃蟲桃蠹蟲也拚飛維鳥

其類又有大者如鳥其毒甚於蜂則獨蜂也獨蜂大如燕人遭螫者立亡蜂中至可畏者也草蜂革蜂石蜂皆不及

未堪家多難子又集于蓼

聞跡曰蓼地名也見春秋楚公子滅蓼一在壽州霍邱縣唐所謂蓼州也一在唐州湖陽縣杜氏所謂二國者也書成王黜殷命滅淮夷還歸在豐當時淮夷不賓成王蓋自征之所謂撫萬邦

巡侯甸四征弗庭者也言又集于蓼蓋征淮之時也孔氏黜殷在周公東征之時滅淮夷在成王即政之後事相因故連言之此頗得其實

總聞曰鄭氏以為信管蔡疑周公其後懲艾之辭也今觀稱懲似有懲于前也稱毖似有謹于後也管蔡纒息淮夷又騷此所謂多難也閔予小子訪落敬之小毖四詩或當在雅而今在頌必有不得其所者序者既以神明祭祀為頌之端曰閔予小子嗣王朝于廟猶之可也

訪落嗣王謀於廟亦猶之可也敬之羣臣進戒嗣王此  
嗣王求助恐與盛德成功告神之意有戾何不皆言在  
廟非不欲之自度有所不安也

載芟

一章

載芟載柞其耕澤澤千耦其耘徂隰徂畛侯主侯伯止  
侯亞侯旅侯疆侯以有嗇其饁止思媚其婦有依其士  
有略其耜止俶載南畝播厥百穀實函斯活止驛驛其

達有厭其傑止厭厭其苗綿綿其庶止載獲濟濟有實  
其積萬億及秭止為酒為醴烝畀祖妣以洽百禮止有  
飶其香邦家之光止有椒其馨胡考之寧止匪且有且  
匪今斯今止振古如茲

聞音曰柞側伯切澤直格切伯與澤一葉  
與伯一葉不換韻士相連一葉穀活連一葉活呼酷  
切達傑連一葉達陀悅切苗庶連一葉庶表驕  
切濟積秭連一葉濟子禮切積子易切醴妣禮

連一葉香光連一葉馨寧連一葉末一句單結  
如生民體意凡十一葉

總聞曰此詩凡其意所起皆曰有有喻其饒有依其士  
有略其耜有厭其傑有實其積有飶其香有椒其馨如  
生民意所起皆曰誕誕有皆發辭也發辭雖是虛語其  
間物態事情燦可覩也

良耜

一章



畷畷良耜俶載南畝止播厥百穀實函斯活止或來瞻  
女載筐及筥其饗伊黍止其笠伊糾其縶斯趙以薶荼  
蓼止荼蓼朽止黍稷茂止止獲之捥捥積之粟粟止其  
崇如墉其比如櫛以開百室止百室盈止婦子寧止止  
殺時捥捥有捥其角以似以續止續古之人

聞音曰畝滿罪切畝與耜一叶活呼酷切活與穀  
一叶女宮黍一叶糾趙蓼一叶糾其皎切朽茂  
一叶捥栗一叶墉櫛室一叶盈寧一叶捥角續

一叶角姑沃切末一句單結如載芟體凡九叶  
總聞曰兩詩皆稱實也斯活此非習知田野深探物情  
不能道此語

絛衣

一章

絛衣其絛載弁球球自堂徂基自羊徂牛止 羸鼎及羸  
兕觥其觥旨酒思柔不吳不敖胡考之休

聞音曰吳氏以牛為魚奇切叶羸津之切不若以

牛附上以鬲附下自叶

總聞曰將祭而眡牲眡饌眡器之類也既畢燕以勞之  
自堂徂基自上而下也自羊徂牛自小而大也鬲鼎及  
鬲自大而小也言往復檢校也

酌

一章

於鑠王師遵養時晦時純熙矣

尋詩無酌字亦無酌意恐鑠字是灼字陸氏酌亦作

灼與酌同意而與灼同形與灼同音恐初傳是灼字  
已而漸轉作灼又漸轉作酌集韻鑠亦作耀灼亦作  
焦字畫相犯甚多說文鑠銷也灼炙也皆是火意或  
古字通用亦未可知

是用大介我龍受之止蹻蹻王之造載用有嗣實維爾  
公允師

爾公允師太公也武王沒成王嗣太公尚無恙見書  
二公其一太公

聞音曰矣之嗣師相叶矣魚奇切嗣詳茲切亦叶師  
總聞曰遵養時晦謂文王也我龍受之謂武王也載  
用有嗣謂成王也公號師官則望也湯造商專以伊尹  
為辭曰聿求元聖與之戮力以與爾有衆請命上天武  
王造周亦專以太公為辭曰既獲仁人敢祇承上帝以  
遏亂略或謂太公周召之徒此不然也尋詩可見此詩  
公字上加以實師字上加以允至確之辭也

桓

一章

綏萬邦屢豐年

在第四句以為首題此詩主意在桓

天命匪解桓桓武王保有厥士于以四方止克定厥家

於昭于天皇以間之

聞音曰邦補耕切年彌因切相叶家旁紐作甲間

旁紐作甲可叶又天間一叶別出

聞字曰間作間古字多用此日當作月可與天相

叶閒亦讀作賢賢音閒以賢取聲閒賢通用

總聞曰此歸馬放牛之後也士則保之家則定之天意可知自此無復事也君其處之以閒爾

賚

一章

文王既勤止我應受之敷時繹思止我徂維求定時周之命於繹思

尋詩皆無賚字亦無賚意當是諸詩間有無題者後

人衍意取題武成一戎衣天下大定此徂維求定則是大定也此時周之命則是武成列爵分土之命由此遂以賚為題又恐其不可也此詩再我集韻予我也又予賜予也曲意為辭釋所以予之之意蓋自我生辭而其心有所不安故其辭不覺涉無謂也賚為予其誰不知予必於善人亦其誰不知豈有武王聖君而錫予惡人乎其無謂可見也

聞音曰兩思相叶前叶止與之叶止真而切後叶



定與命叶皆結以思

總聞曰文王以勤造始我亦當以勤受成初言繹推而廣之故曰敷再言繹敷之不足盡之故曰於說文繹抽絲也絲細也長也漸抽漸出也不當作陳思辭也作辭則有餘味作惟則既云繹又云思即覺語繁而意枯上時辭也於辭也下思辭也中存一繹字有詠歎淫液之勢此則在人會意也

般

一章

於皇時周

題如賚於詩無見亦是推衍武成之文末云垂拱而天下治即有樂意此詩處頌之終故以處武成之終者倣之雖不失為師經然亦用意太過也

陟其高山隴山喬嶽允猶翕河敷天之下哀時之對時  
周之命

聞音曰此詩叶音皆在末語上一字恐是其音如

此通稱三字單稱一字於皇時者周也陟其高者山也墮山喬者嶽也允猶翕者河也高與喬叶翕旁組作熙熙與前時後之叶敷天之者下也衰時之者對也時周之者命也以之相叶古人皆不徒然雖其音不可得而聞然搜辭尋音未至於害義悖理持好古之過爾

總聞曰尚恐天下未習周號也初曰是為周末曰是為周初末相應庶天下知今代之為周非故商也前詩亦

曰時周之命蓋我知天下為周而再三繹之勿使其復為商也兩言時周之命一謂己一謂人也善哉孟子之言曰由湯至于武丁賢聖之君六七作天下歸商久矣久則難變也武丁朝諸侯有天下猶運之掌也紂之去武丁未久其故家遺俗流風善政猶有存者經世武王克商己卯以武庚守商都而續之庚辰以管叔蔡叔霍叔分商畿為三而監之八年丙戌而同叛又三年戊子而乃平又三年庚寅以西周去關東之遠也又營東周

又二年壬辰成周而周公分政成周東郊又五年丙申  
君陳繼之又二十九年癸亥畢公繼之又二十六年而  
康王崩昭王立其後不復詳見此事書陳其迹詩陳其  
意則商周之際雖遠而可想見也

詩總聞卷十九

欽定四庫全書

詩總聞卷二十

宋王質撰

魯頌

駟

一章

駟駟牡馬在坳之野薄言駟者有驕有皇有驪有黃以車彭彭思無疆思馬斯臧

二章

駟馬牡馬在坳之野薄言駟者有騅有駉有駢有駢以  
車伍伍思無期思馬斯才

三章

駟馬牡馬在坳之野薄言駟者有驪有駘有駢有騅以  
車繹繹思無數思馬斯作

四章

駟馬牡馬在坳之野薄言駟者有駟有駉有駢有駢以



車祛祛思無邪思馬斯徂

思皆辭也一言以蔽之曰思無邪孔子自發此辭非引此語也或用此語亦可蓋辭韻雖不同而意故在也邪祥余切與徐徐同邪羊諸切與餘余同二字相通緩也邪徐嗟切與斜澇同不正也審爾三字皆從牙入麻韻亦可三字皆同余入魚韻亦可孔子雖引魚韻之詩自入麻字之意也思與邪同雖引語辭之詩自入思惟之意也蘇氏有思皆邪無思則土木也

當何使有思而無邪無思而非土木此孔子之所盡  
心也此是否固未論又曰孔子於詩其有會於吾心  
則此甚善既會心不逆所從來亦不追所從往自是  
吾心有見非干詩也聖賢引詩多然而此尤足以令  
人起意也

聞音曰馬滿補切野上與切者掌與切彭鋪郎切  
才斯西切繹弋灼切斲弋灼切駮謨孤切邪祥  
余切

聞字曰戰馬用牡不用牝惡亂而難整也此當是  
習戰待敵或改作牧恐非十六種馬惟魚黃皇  
雒無旁從集韻馬二目白曰魚黃與皇雒與駱  
相犯集韻馬黃白曰驤或從驥白色黑髦尾曰  
駱或作雒但不言其少異安庀詩必不同章重  
出也凡物未有不從其本類者詩偶省文其他  
字畫多然

聞跡曰毛氏垆遠野也邑外曰郊郊外曰野野外

曰林林外曰坳鄭氏牧於坳野辟民居與良田也禮以官田牛田賞田牧田任遠郊之地此說甚善說文坳牧馬苑也引此在坳之野則是上下駟字同也恐許氏不若毛鄭氏之長

總聞曰山北山西山東之馬皆良東差下於西西差下於北惟南最下僖公東馬從事於荆舒淮夷之間宜乎得志也

有駟

一章

有駉有駉彼乘黃夙夜在公在公明明振振鷺鷺于  
下鼓咽咽醉言舞于胥樂兮

二章

有駉有駉彼乘牡夙夜在公在公飲酒振振鷺鷺于  
飛鼓咽咽醉言歸于胥樂兮

乘黃趨公所也明明自夙及夜然未暗也振鷺下鷺  
將宿晚之候也言舞正歡之時也乘牡亦趨公所也

飲酒自夙及夜然尚飲也振鷺飛鷺將起曉之候也  
言歸已闌之時也

三章

有駟有駟彼乘駟夙夜在公在公載燕自今以始歲  
其有君子有穀貽孫子于胥樂兮

載燕又燕也前二章一會也此一章一會也記時候  
早晚前已以鷺于下于飛言之記歡情始末前已以  
醉言舞言歸言之至是則以頌禱之情結之前二章

所言此亦有此一章所言前亦有互相備也特頌禱  
最為至情故以為結辭

聞音曰明謨郎切下後五切牡莫後切鬪呼縣切  
有羽軌切

總聞曰頌禱之辭多言福言祿而此獨言豐年自今以  
始言昔多無年也春秋自莊閔至僖十餘年之間莊二  
十五年大水二十七年無麥禾二十九年有蜚僖二年  
三年冬春夏不雨此詩當是此年以後也蓋自隱公弑

于羽父桓公弑于彭生莊公雖免于叔牙而公子般公子開卒不克免于慶父至是僖公得季友之力加奚斯之助除慶父之逼同經患難共享安平其情豈比于經常之君臣故此夙夜在公其禮亦非經常之燕饗也

泮水

一章

思樂泮水薄采其芹魯侯戾止言觀其旂其旂筏筏鸞



聲噉噉無小無大從公于邁

二章

思樂泮水薄采其藻魯侯戾止其馬蹻蹻其馬蹻蹻其音昭昭載色載笑匪怒伊教

三章

思樂泮水薄采其茆魯侯戾止在泮飲酒既飲旨酒永錫難老順彼長道屈此羣醜

四章

穆穆魯侯敬明其德敬慎威儀維民之則允文允武昭假烈祖靡有不孝自求伊祐

五章

明明魯侯克明其德既作泮宮淮夷攸服矯矯虎臣在泮獻馘淑問如皋陶在泮獻囚

魯侯將至則喜泮水魯侯已至則喜魯侯變思樂而言穆穆明明變泮水而言魯侯變戾止而言明德人情漸變物態漸更故詩人措辭有差

六章

濟濟多士克廣德心桓桓于征狄彼東南烝烝皇皇不  
吳不揚不告于訖在泮獻功

變穆穆明明而言濟濟變魯侯而言多士總言獻馘  
獻囚獻功之人也大率主意皆定東南之事獻功獻  
其所成之功以待賞錫也

七章

角弓其觶束矢其搜戎車孔博徒御無數既克淮夷孔

淑不逆式固爾猶淮夷卒獲

變獻馘獻囚獻功而言角弓束矢戎車變多士而言  
徒御總言弓矢戎車之人也

八章

翩彼飛鴉集于泮林食我桑黥懷我好音

桑黥春夏時與芹藻茆相應

憬彼淮夷來獻其琛元龜象齒大賂南金

聞音曰旂其斤切躋居表切昭之繞切茆力九切

老魯吼切道徒厚切服蒲吐切馘以璧切陶夷  
周切南尼心切詘許容切斨弋灼切逆宜脚切  
獲黃郭切

聞訊曰觥弓弦急也搜矢發也今曠野廣場聞發  
矢有此聲博寬也鄭氏改博作傳蓋欲叶斨音  
杜又欲叶逆音遇叶獲音護今不改自叶定從  
吳氏

聞物曰茆蓴菜也與芹藻皆泮水所產采此以為

飲酒之菹此物多生陂澤可見在郊

總聞曰禮天子將出征類于上帝宜乎社造乎禴禡于  
所征之地受命于祖受成於學出征執有罪反釋奠于  
學以訊馘告古之所謂學者君臣上下會集禮樂刑政  
發施之所在朝所與見者寡在學所與見者衆辟雍學  
之兩所泮亦學之一所其他先世之別廟先臣之別位  
以至射圃宣榭無所不有可以祭祀可以燕饗可以刑  
賞可以游觀故靈臺有臺有園有沼有辟有雍故此會

集之廣所也古器有在辟宮有在雍位有在下保雍有  
在西宮燾燾亦雍也而振鷺亦有西雝禮既辟雍泮水  
分配天子諸侯則其泮水者亦不一所也古器有在和  
宮亦是雝之異名又在寒亦是辟之異名寒栗猶辟易  
此肅意也泮水當是判意判渙猶剖斷亦辟意也僖公  
當時偶于學在泮故因以得傳其他所在不可得而考也  
說文泮諸侯鄉射之宮西南為水東北為牆具為鄉射  
之宮則未可知至西南為水東北為牆則附會泮水之

意未必然也凡字從半皆判散之意集韻判分也泮釋也伴胖廣也迷去也泮棄也駢行也自許氏之前鄭氏固已言築土雖水圓如壁築土安能停水持附合雖意而不知其不可也泮言半也東西門以南通水北東門自南通北西門自南通北則回環皆水非半水也鄭氏知其不安故西南為水東北為牆凡宮室面南背北今自南而西皆水自東而北皆牆乃不成宮室字形宮明在前南也暗在後北也室通在前南也塞在後北也圓



水猶之可也半水未可信之禮小學在公宮南之左太  
學在郊書傳百里之國二十里之郊七十里之國九里  
之郊五十里之國三里之郊國愈大則郊愈濶學愈寬  
後世所謂學者持其間論十二事略倣其大槩而全非  
其本意養老一事又已不存其餘制度文物皆不可復  
推雖然又何獨此而已

闕宮

一章

闕宮有佺實實枚枚赫赫姜嫄其德不回上帝是依無  
災無害彌月不遲

二章

是生后稷降之百福黍稷重穡稊稷穡麥奄有下國俾  
民稼穡有稷有黍有稻有秬奄有下土纘禹之緒

三章

后稷之孫實維大王居岐之陽實始翦商

詩蓋以作岐為興周之基未有以居岐為翦商之始

也易隨上六王用享于西山升六四王用享于岐山  
六四非尊位而自此享也

至于文武纘大王之緒致天之届于牧之野無貳無虞  
上帝臨女敦商之旅

此闕宮所奉者婦人略舉其大者一人曰姜嫄其太  
姜太任太姒皆在也先祖略舉其大者四人曰后稷  
太王文武其公劉王季皆在也

四章

克咸厥功王曰叔父建爾元子俾侯于魯大啟爾宇為  
周室輔

言叔父亦有功也所謂克咸咸同也其下太山梁父  
山在今奉符縣龜山繹山在今鄒縣皆在兗州龜山  
在沂州徐在徐州鄒山記曰徂徠在梁甫山多松栢  
梁甫新甫也

乃命魯公俾侯于東錫之山川土田附庸

此闕宮又所奉者畧舉二人曰周公魯公其莊公皆

在也

五章

周公之孫莊公之子龍旂承祀六轡耳耳春秋匪解享  
祀不忒皇皇后帝皇祖后稷享以騂犧是享是宜降福  
既多

自天下言之以后稷為宗自后稷以下皆在自一國書  
之以周公為宗自周公以下皆在朱氏闕宮魯之羣  
廟會其天下所謂始一國所謂始凡與同姓悉皆同

宇其實私祭之公所也

六章

周公皇祖亦其福女秋而載嘗夏而福衡白牡駢剛犧尊將將毛兕載羹籩豆大房萬舞洋洋孝孫有慶

孝孫有慶謂飲福受胙也故頌禱僖公見下

七章

俾爾熾而昌俾爾壽而臧保彼東方魯邦是常不虧不崩不震不騰三壽作朋如岡如陵

此詩稱六俾凡三節一節俾爾熾而昌俾爾壽而臧  
一節俾爾昌而熾俾爾壽而富三節俾爾壽而大俾  
爾耆而艾此所舉之壽皆以朋而來也

八章

公車千乘朱英綠滕二矛重弓公徒三萬貝冑朱綬烝  
徒增增戎狄是膺荆舒是懲則莫我敢承

畢祭凡與祭者禱主人之福自熾昌壽臧以下是也  
頌主人之功自公車朱英以下是也

九章

俾爾昌而熾俾爾壽而富黃髮台背壽胥與試俾爾昌而大俾爾耆而艾萬有千歲眉壽無有害

作朋之福未盡其意又推廣之自俾爾昌而熾以下是也

十章

泰山巖巖魯邦所啓奄有龜蒙遂荒大東至于海邦淮夷來同莫不率從魯侯之功



莫敢承之功未盡其意又推廣之自泰山巖巖以下  
是也

十一章

保有鳧繹遂荒徐宅至於海邦淮夷蠻貊及彼南夷莫  
不率從莫敢不諾魯侯是若

十二章

天錫公純嘏眉壽保魯居常與許復周公之宇  
俾爾之福猶未盡其意又推廣之自天錫公純嘏以

下是也毛氏常許魯南鄙西鄙鄭氏許許田也魯朝宿之邑常或作嘗在薛之旁引魯莊三十一年築臺于薛以為田文食邑于此皇覽孟嘗家在魯國薛城引此以鄭氏為證索隱亦嘗非諡乃邑又引此以鄭氏為證然常氏地譜以為其地未見鄭氏亦以為所由未聞亦意之也或謂堂父在沂州當是音字皆轉長清在齊州長白山長城在淄州當是字轉恐此常只當如魯邦是常之常蓋其邦常居曲阜是也隱八

年鄭伯使宛來歸禘左氏鄭伯請釋太山之祀而祀  
周公以太山之禘易許田庚寅我入禘而未有也桓  
元年鄭伯以璧假許田當是以禘未成又以璧來求  
乃許三月公會鄭伯于垂四月公及鄭伯盟于越左  
氏結禘成也則是許為鄭得許僖公復取之也杜氏  
成王營王城故賜周公許田以為魯國朝宿之邑後  
因立周公別廟鄭桓公有助祭太山湯沐之邑故欲  
以禘易許田各從本國所近之宜恐魯以周公別廟

為疑故言已廢太山之祀而欲為魯祀周公遜辭以  
有求也豈有始祖別廟人主賜邑而以易他人湯沐  
之地可謂魯之大耻不知僖公於何年復之僖五年  
諸侯盟于首止鄭伯逃歸不盟六年公會諸侯伐鄭  
楚人圍許諸侯遂救許魯以鄭逃盟而伐之楚以諸  
侯伐鄭而圍許以救之許遂歸楚當是此時乘鄭間  
魯楚伐許田而遂復取許田也

魯侯燕喜令妻壽母宜大夫庶士邦國是有既多受社

黃髮兒齒

妻也母也當是存者也其亡者皆入近廟其存者頌  
禱主人之餘則皆及之大夫庶士則羣臣皆在也邦  
國是有則舉國凡民亦在也所謂既多受祉也黃髮  
兒齒蓋妻母外族也君民闔境也皆有此壽徵

十三章

徂來之松新甫之栢是斷是度是尋是尺松栢有鳥路  
寢孔碩新廟奕奕奚斯所作孔曼且碩萬民是若

此廟即閼宮也近於正寢故知閼宮者私祭之公所也毛氏新廟閼公廟也閼公無功德又兄弟自無由別立廟鄭氏新廟姜嫄廟也姜嫄雖有功德然外姓亦無由作始廟蓋后稷以下普廟也姜嫄為首者記后稷所由生也奚斯督工庀事之官鄭氏教護屬功課章程是也班氏兩都賦奚斯頌魯王延壽靈光殿賦奚斯頌僖非也賈氏以誤指作詩主名

商頌

那

一章

猗與那與置我鞀鼓奏鼓簡簡衍我烈祖

初則置鞀鼓未用既而奏鞀鼓蓋衆樂已作鞀鼓所以節樂者也

二章

湯孫奏假綏我思成鞀鼓淵淵嘒嘒管聲既和且平依我磬聲

次執鼓管磬並奏奏進也假升也前奏鼓奏作樂也  
此奏假奏升堂也此詩三稱湯孫自是三節一進告  
升堂也謂奠神也二燔幣有光也謂畢事也三受胙  
均享也謂飲福也開其夷懌之容述其溫恭之職執  
事有勞而助祭有能也

三章

於赫湯孫穆穆厥聲庸鼓有數萬舞有奕

次鼓鐘萬舞並奏奕字象形商奕車觶奕奕字如此



今稱蓋舞之狀也

四章

我有嘉客亦不夷懌自古在昔先民有作溫恭朝夕執事有恪顧予烝嘗湯孫之將

鄭氏太古有此助祭之禮恐非謂樂之節奏祭之次第自古作此非今創為古民人通用先民即是古人自唐諱民始更改參錯後有復者有不復者詩兩稱先民此古語也一稱先人不知舊語如此惟復改如

此或謂宜民宜人當作宜民宜民蓋重言之後一改  
一不改王氏在至和中欲改年作宜民或難王氏以  
宜民宜人今但取半語非是王氏以重言為對然卒  
不用也王氏最博古多藏書其所見必有自來也

聞音曰淵於市切斲弋灼切客克各切奕弋灼切  
懌弋灼切昔息約切夕祥禽切

聞章曰舊一章今為四章

聞字曰庸或作鏞古字亦通用

總聞曰已下皆商詩商廟所用也舊說用于成周之廟  
曰周用六代之樂也又說用於微子之國曰二王之後  
得自用其先之樂也識者更詳

烈祖

一章

嗟嗟烈祖有秩斯祐申錫無疆及爾斯所既載清酏

二章

賚我思成亦有和羹既戒既平駿假無言時靡有爭

前詩聲也所言皆音樂此詩臭也所言皆飲食也商尚聲周尚臭二詩當是各一節那奏聲之詩此薦臭之詩也商尚聲故以樂居先

三章

綏我眉壽黃耆無疆約軼錯衡八鸞鶴鶴

四章

以假以享我受命溥將自天降康豐年穰穰

五章

來假來饗降福無疆顧予烝嘗湯孫之將

聞音曰衡戶郎切饗虛良切

聞章曰舊一章今為五章

總聞曰此皆祀湯也故皆曰烈祖序者以那為祀成湯  
以此為祀中宗鄭氏引及爾斯所附合及女之此所女  
中宗也不知何以見之自湯而下皆可以為及女皆可  
以為斯所而獨歸中宗何也豈非以玄鳥為武丁在那  
玄鳥之間未有所歸而湯之後高宗之前中宗盤庚為

賢中宗既在盤庚之先而桑穀變災為祥可合自天降  
康之文今觀烈祖既同辭猗與那與嗟嗟又同意而綏  
我思成賚我思成小異大同顧予烝嘗湯孫之將全同  
不獨出于一時亦出於一人也

玄鳥

一章

天命玄鳥降而生商

玄鳥記節而記節之間又自有說禮仲春玄鳥至以

是日祠高禱當是此年玄鳥至而有孕次年玄鳥至而生契是十三月而始誕也故知其有天命吞卵之事不惟誕又且猥漢高猶龍種商契乃燕種子識者更詳

宅殷土芒芒古帝命武湯正域彼四方

帝謂嚳也嚳居亳後自契八遷至湯而復居亳故書從先王居作帝告釐沃帝告當是言帝命之意釐沃當是言正域四方之意孔氏釐治沃土也

二章

方命厥后奄有九有商之先后受命不殆在武丁孫子

三章

武丁孫子武王靡不勝龍旂十乘大騫是承邦畿千里  
維民所止肇域彼四海

四章

四海來假來假祁祁景員維河殷受命咸宜百祿是何  
商都近河言來者如河也何不足為數言何止百祿



也鄭氏以河為何以何為荷毛氏任也鄭氏擔負天之多福皆荷意也所不可曉

聞音曰有羽軌切殆養里切勝書烝切海虎猥切  
祁宜隔句相叶河何亦隔句相叶

聞訓曰景集韻光也當讀如泛泛其景之景水光也員集韻語辭也鄭氏古文作云

聞章曰舊一章今分四章

總聞曰此高宗之子孫祀成湯者也祀高宗在下

長發

一章

濬哲維商長發其祥洪水芒芒禹敷下土方止外大國是疆幅隕既長有城方將帝立子生商

有城契母也帝謂舜也所立之人子姓所生之地商邑也

二章

玄王桓撥受小國是達受大國是達率履不越遂視既

發相土烈烈海外有截

玄王契也玄鳥至而生記時稱曰玄王商既有天下  
之後不追諡而追稱如武成惟先王建邦啟土孔氏  
謂后稷也自契之後湯之前十三傳而獨舉相土一  
人左氏闕伯居商丘相土因之是最盛者有此也

三章

帝命不違至於湯齊

自相土而下昌若曹圍冥振微報丁報乙報丙主壬

主癸皆事夏不敢違命至湯而曰天乙是與帝齊有  
代君之德偏上之勢此帝桀有夏臺之囚如商紂有  
羗里之錮皆寢鄰于大位故致疑也

湯降不遲聖敬日躋昭假遲遲上帝是祇帝命式于九  
圍

降生也屈氏歲庚寅吾以降自湯之生則天時人事  
甚疾而不遲也聖也敬也隨日而升而湯格天甚緩  
事天甚嚴夏帝使為表式于天下則時已至也循征

湯征諸侯，孔氏為夏，方伯得專征，伐與文王、西伯之事相同也。葛伯不祀，湯始征之，與文王伐崇之事相同也。經世丁丑，湯即諸侯位，即方伯也。戊寅成湯征葛，始專征也。上帝天也，帝君也。夏商皆稱帝號。

#### 四章

受小球，大球為下國綴旒，何天之休，不競不綽，不剛不柔，敷政優優，百祿是道。

#### 五章

受小共大共為下國駿厖何天之龍敷奏其勇不震不動不難不竦百祿是總

六章

武王載旆有虔秉鉞如火烈烈則莫我敢曷

前詩先言武湯次日武王此又曰武王大率湯以武為盛即其盛者相承為常稱雖非諛亦習呼也

苞有三蘂莫遂莫達九有有截韋顧既伐昆吾夏桀

朱氏苞夏桀也蘂韋也顧也昆吾也甚善

七章

昔在中葉有震且業

承上芑蘩為辭言湯為葉在芑蘩之中芑覆于上  
蘩攻于下可謂不安

允也天子降于卿士實維阿衡實左右商王

書序伊尹去亳適夏孔氏進于桀也既醜有夏復歸  
于亳孔氏不能用賢復退還也經世己邠薦伊尹于  
夏王壬午伊尹歸亳降于卿士者此也乙未伊尹相

湯伐桀實維阿衡實左右商王者此也

聞音曰共居容切厖莫紅切若欲平叶則六句皆  
叶龍若欲仄叶則六句皆叶動三平三仄亦可  
但與上不類蘖魚割切衡戶郎切

總聞曰此詩之體全與大明相符古人文章亦有所祖  
述不苟作也

殷武

一章



捷彼殷武

殷武商武丁也成湯號武王其後二十九主以武為號者二人武丁得聲至商武乙得禍至大最後武庚續商祀亦不令終大率在商周以文武為極稱而商為至嚴觀死生禍福之際則天心人心曾何異也奮伐荆楚采入其阻裒荆之旅有截其所湯孫之緒

二章

維女荆楚居國南鄉昔有成湯自彼氐羌莫敢不來享

莫敢不來王曰商是常

西北夷強東南夷弱言西北尚爾東南當如何勅之  
辭也易既濟高宗伐鬼方三年有賞于大國雖不言  
高宗實高宗也象曰志行也商有虎方彞博古虎方  
鬼方也楚人好鬼故曰鬼方虎在東北則非南也易  
與詩相應虎方之彞容有差也

三章

天命多辟設都于禹之績歲事來辟勿予禍適稼穡匪

解

在禹荆楚屬荊州汝乃我王土所有循歲事來朝王  
則我不汝禍不汝過保田業不解散也不然汝豈得  
安也勅之辭也

四章

天命降監下民有嚴不僭不濫不敢怠遑命于下國封  
建厥福

僭濫怠遑無此三過則命汝有邦與封建同福不然

不得我命汝何以自立又勅之辭也

五章

商邑翼翼四方之極赫赫厥聲濯濯厥靈壽考且寧以  
保我後生

此高宗子孫祀武丁謝之辭也

六章

陟彼景山松柏丸丸是斷是遷方斲是虔松栢有槩旅  
楹有閑寢成孔安

司馬氏武丁歿祖庚立祖己嘉祥雉之德立廟為高宗雉是災非祥稱宗不為此也然既尊為高宗則立廟審也當是此寢

聞音曰享虛良切解古義切音係適丁歷切音的旁紐作丁計切音地叶係集韻嚴魚銜切濫盧甘切此作一叶國越逼切福筆力切此作一叶吳氏不必以嚴作莊避漢諱而改


聞句曰左氏魯哀五年引此不僭不濫不敢怠

違命以多福比今詩校少一句更三字杜氏無  
他辭又魯襄三十六年引此不僭不濫不敢怠  
違命于下國封建配福比今本相同杜氏亦無  
他辭則春秋之時所傳已有差舛大率左氏所  
引多與今本異同持在圓機以情以理推之而  
已

聞跡曰景山在澶州與定之方中景山同

總聞曰首舉湯以為辭湯之威德入人之心甚深後世

不無所憑藉也如周之子孫舉事多稱文武



詩總聞卷二十